


ԹԱՐԳՄԱՆՉԱՑ ԺԱՌԱՆԳԸ

Օրերս Հոգևոր Ծեմարանի հանդիսությունների դահլիճում, Վեհափառ Հայրապետի բարձր նախագահությամբ, նշվեց Հոգևոր Ծեմարանի դասախոս, պատմաբան, բանասեր, ձեռագրագետ Արտաշես Մաթևոսյանի ծննդյան 75-ամյակը: Ի գնահատումն արն. Մաթևոսյանի՝ հայ գրչությանն ու մշակույթին մատուցած բազմապատասխան ծառայության, Հայոց Հայրապետը նրան շնորհեց Հայ Եկեղեցու «Ս. Սահակ-Մեսրոպ» շքանշանը. «Արժան և իրա»:



Մեծ և բազմաթիվապատկեր լինող Հոգևոր Ծեմարանի սիրելի դասախոս Արտաշես Մաթևոսյանի կատարած գործը: Նրա բազմաթիվ հոդվածներն ու գրությունները վերապրեցումն են հայոց բոլոր մեծ ու փոքր գրչության կենտրոնների, բազմաթիվ, բայց երբեմն մոռացված անխոնջ գրիչների, դարերի անցուդարձը տեսած, բայց այժմ գրապահոցներում իրենց խաղաղությունը վայելող հնագույն և նշանավոր մատյանների: Նա խոսել, գրուցել, խոսեցրել և նրանց միջոցով իսկ նշգրտել է մեր մեծագործ Հայրերին՝ Կորյունին, Խորենացուն, Շիրակացուն: Եվ այնպես է թվում, թե խոհուն գիտնականը եղել է նրանց կողքին ու նրանց մոտից էլ եկել-հասել մեզ:

Նրա հոդվածներն ու ուսումնասիրությունները մշտապես տեղ են գրավել Մայր Աթոռիս պաշտոնաթերթ «Էջմիածին» ամսագրում, որոնց անվանական պարզ թվարկումն իսկ կարող է մի քանի էջ զբաղեցնել:

Մենք այստեղ, սակայն, չենք ուզում խոսել Մաթևոսյան գիտնականի մասին, այլ մեր ցանկությունն է՝ ներկայացնել Ծեմարանի դասախոսին: 1980 թվականից ի վեր մի քանի սերունդ հոգևորականներ են սնվել այդ անսպառ աղբյուրից, որը, սակայն, գնալով ավելի ու ավելի է առատացել ու կենսամորոգ դարձել: Նրա անպարփակ սերը դեպի հայ գրի, գրականության թագն ու պսակը հանդիսացող ձեռագրերը չի մնացել սոսկ իր եսական շրջանակի մեջ, այլ որպես միս ու արյուն դարձել է նաև նրա բոլոր տարիների ճեմարանական աշակերտների սեփականությունը: Ապրում է նրանցով մերօրյա ձեռագրահայրը՝ ապրեցնելով բոլորիս: Մենք «արտաշեսյան» բառ ու բանով սովորեցինք հասկանալ ու խոսել և՛ Մաշտոցի, և՛ Կորյունի, և՛ Խորենացու, և՛ Ծիրակացու, և՛ Թորոս Ռոսլինի, և՛ Մոկաց Սարի Ս. Գևորգ վանքի, Մեծոփա վանքի, Լիմ անապատի, Հաղբատի, Սանահինի, Գուգարքի, Գլաձորի, Վաղարշապատի, Երևանի դպրոցների ու գրչության կենտրոնների մեծատաղանդ Հայրերի՝ հայ հոգևոր կյանքի ռահվիրաների հետ:

Իր ծով գիտելիքներով հանդերձ՝ պրն. Մաթևոսյանը ուսանողներին համար համեստ և խոնարհ մարդ է, ում միջոցով ճշմարիտ պատկերացում ես կազմում և թանձրացած զգում մեր Տիրոջ խոսքը, թե՛ «Եթե ոք կամի առաջին լինել՝ եղիցի ամենեցուն կրտսեր և ամենեցուն պաշտօնեայ»: Իսկապես համեստագույն լինելու հանգամանքն է, որ դասել է նրան մեծերի շարքում: Յուրաքանչյուրի հետ իր խոսքով, անձանձրույթ վերլուծումներով, պարզաբանումներով ու եզրահանգումներով զրուցում է ոչ որպես մեծադղորդ ու գիտելիքների տարափով ճնշել փորձող «գիտնական», այլ որպես պարզ մի ավետարանական մշակ, ով կարծես անմնացորդ և անսակարկ ցանկություն ունի դարերը կապելու իրար՝ նորին հաղորդել հնի ամբողջ բուրմունքն ու զմայլանքը, նաև կրթել, մշակել, հղկել ու հնարավորություն և կարողություն տալ՝ իր հերթին ևս լինելու ժամանակների շարունակողը: Ծեմարանականներիս մշտապես գրավել են բազմաքանքար այս սքանչելի մարդու դասաժամերը, որոնք, սոսկ տեսական, ուսումնասիրական լինելուց ավելի, շաղախված են կյանքի հետ՝ ունկնդրություն դարերի համերգին, ամեն խաչքարի ու շիրմաքարի, ձեռագրի ու գրիչի հետ հազար ու մեկ անգամ ապրելու և վերապրելու ազնվացնող թույլենք:

Մաշտոցյան Մատենադարանի հսկայածավալ շենքի իր մի փոքրիկ խցասենյակում այսօր ևս Արտաշես Մաթևոսյանը շարունակում է «մի կում ջրով, մի նշխարով» մեր պատմությունը՝ վեր հանել մագաղաթներից դժգույն և ամենախոնարհ գրչի նման ստորագրել. «Ով եղբարք, ընդօրինակեցաւ յագնիւ և ստոյգ արինականաց: Եթէ սխալանք ինչ իցէ, յիմում անհմտութենէ է, անմեղադիր լերուք»:

«Էջմիածին» ամսագրի խմբագրությունը շնորհավորում է բազմաջան գիտնականի ծննդյան 75-ամյակը և այս առիթով Վեհափառ Հայրապետի կողմից «Ս. Սահակ-Մեսրոպ» շքանշանով պարգևատրումը՝ մաղթելով, որ Սուրբ Սահակն ու Սուրբ Մեսրոպը մշտապես բարեխոս լինեն իրենց վաստակի համբուրելի շարունակողի աշխատանքի և կյանքի համար: